

若菴集

停驂隨筆

第四冊

古人捉筆紀載必非無謂也輟環不廣角觸自處
耳是必壯遊資聞見廓耳目夫而後有所紀述乃
能舒一已之所積而傳其意於無窮然人遊而有
紀述難矣紀述能成一家言益難暢其所欲言而
使國家恩澤宮闕輝煌山川變幻人物盛衰古今
興廢凡觸於吾之目者或艷羨或感激或悲歌慨
歎或拜手揄揚分道區門馳情奔赴僉使見之赫
蹠之上匪特自可怡悅且足以移人性情此則遊
道之至難者也故遊而無詩貿貿然已耳溟滓然
已耳不謂之遊有矣而僅留連風月無所感興草

木榮華飄風已耳鳥獸好音過耳已爾惡在言遊
事有所關意多激切言不雅馴無以傳後是混沌
書者欲益反弊災黎焉已耳充棟焉已耳又安能
使遊之神理傳之於後自怡而且移人也哉若庵
停驂隨筆則異是余昔遊江右製追情一草謂遊
而有感觸皆予情之繫焉者也使無以紀之則當
時之情旋用旋失事後追憶情不我留矣因思以
目追之則炫然以足追之則繭然以心力追之則
神氣竭然用是捉筆追情今京輦非江右比也
天子之聖明湛恩之汪濊京都鄉相之接踵及夫跋

涉之間渡黃河臨日觀以暨先賢故里前代遺踪
皆非江右之所有若庵過目皆以情繫乎中豈予
卮言所能望其肩背耶洵乎為有謂之作也夫有
謂者有物之謂也易家人之象云君子以言有物
而行有恒夫子之釋九三也曰修辭立其誠所以
居業也立誠者有物也苟無謂而措辭則中庸之
所謂不誠無物若菴平居居業素能矯矯僅詩也
乎哉豐山同學弟王棠

春洲芳甸。夜整元暉之裝。修薄長林。朝頓士衡之
轡。中郎之駕京邑。陰雨馬蹠。季珪之造齊都。清風
珮振。經塗事觸鏡。今古於寸衷。離客思深。極川梁
於四眺。維昔文章之伯。率多行旅之篇。下逮今茲。
人矜著作。崎嶇而賦三陟。間關而賡載脂。采杞方
將。竊比劬勞士子。皇華靡及。輒詡原隰征夫。然而
短詠長謠。鮮牛腰之盈軸。含豪吮墨。需獺祭以成
章。疇則好句拾來。取諸襟袖。安得錦囊貯處。夥若
珠璣。襲謬承譌。殊無關乎故實。循聲附響。了未見
其新裁。美矣名編。猗歟令弟。署停驂之隨筆。推倚

馬之驚才。爾其時閱十旬。道踰千里。寒生料峭。方
冒雪而侵霜。夢破迷離。恒披星而戴月。黃倏昏乎
赤日。扇颺庾亮之塵。緇頓化乎素衣。囊染鄭公之
垢。荒榛蔓草。遺廟蒼涼。斷靄零煙。殘碑漫漶。探竒
而凌絕徑。天入青冥。選勝而覓幽棲。谿迴白社。那
辭重趼。任謝守之屐穿。貪曳孤筇。賸阮宣之錢掛。
犬已迎於卽次。縱目忘還。僕屢促其登車。掉頭弗
顧。干卿甚事。好慷慨而悲歌。謂我何求。嗜風流而
跌宕。烏絲牋題綺語。爭推畫壁之人。鐵綽板唱雄
詞。驚倒當壚之婦。客嘲賓戲。間託詼諧。問俗採風。

動歸辨證。枕中而得行秘。車詎數夫指南。卷上而
譜郵籤。鼓寧誇夫記里乎哉。矧夫路通閭闔。張廣
樂之鈞天。節應岡陵。開八荒之壽域。麗形容於雲
日。玉勝珠衡。萃拊蹈於衣冠。縟川藻野。魚龍曼衍。
本希覲於人間。壺嶠方員。竟親逢於輦下。並詳紀
載。合被管弦。休匹馬枚。旣文工而檄敏。長兼張左。
亦都練而京研。倍添盛代新聞。永佐藝林佳話者
也。余也何心。西笈偶作北征。計往返之略同。惜倡
酬之莫共。誰薦正平之表。滅刺羞懷嬾上。襄陽之
書。不才甘棄。天涯雁斷。腸摧班馬聲邊。子舍雲淒。

何駢隨筆
魂逝淋鈴雨裏。祇餘苦調。敢競高吟。且有願之兩
盧。尤斯遊之大闕。翰霑平子。空銜東岱之愁。笏拄
黃門。枉挹西山之爽。俾遙情之如寫。足張吾軍。果
逸興之端飛。差強人意。瞻廬同學。愚兄元愈拜書
於選樓寓堂

若菴集卷第四

停驂隨筆

江南

程庭

且碩

予少長江淮風塵未習乃今驅車北道日有
見聞每於投宿晚餐之餘書之歸檢奚囊序
次先後冠以停驂明是帙所成之時也

歲在癸巳恭逢

皇
上六旬萬壽薄海內外大小臣工以及鄉耆士庶
咸趨赴京師敬申祝釐之忱余以列在兩淮後
亦與行焉先期遣騾綱前發候於淮陰余乃卜於
花朝日偕曹二萊業師許子潛菴汪子海樵辰刻

登舟親串相送者四十餘人固知非久別乃謂余
遠行也解維後北風小阻似不欲余作客之意午
刻抵茱萸灣風乍轉頃之大作逆流而上帆若馬
駛為一大快事汪表兄菊村以送女至孟城附余
舟而前是夜乘風進發月色頗佳至三鼓菊村刺
船而去

花朝日北上留別諸親友用海樵韻

敢思老大博浮名弱冠當年愧請纓海日曛曛
魚乍躍春風披拂鳥爭鳴九如早擬賡天保三
疊無煩唱渭城只覺故園忘不得林花應自滿

瑶京

孟城舟中對月再用前韻

沽來紅玉舊標名頭沒深杯笑絕纓征雁偶隨
漁艇度荒雞遙傍戍樓鳴漫疑詩興偏成癖不
信愁腸尚有城欲趁清光橫鐵笛先從鼇背矚
神京

十三日未刻住平河橋屏當驟馱

十四日早微陰坐驟車至淮飯已發烏沙河風雨
大作長堤泥濘曹師幾有覆轅之患甫渡黃河衣
囊漬透住王家營作家書遣僕方昇歸報平安晚

有晴意是日得詩二首

黃河

泝泝黃河水源從天上來異茲塵濁質偏自聖
靈胎瑞叶榮光幕高連雲漢回滄浪非一派孺
子莫相猜

作家書並題紙尾

酸梨端識勝蘋婆驛路何嘗廢嘯歌節過花朝
纔兩日斜風潑雨渡黃河

十五日陰晦塗泥未乾沙塵不起午過魚溝小歇
令僕役飽餐晚霽宿衆興集

喜晴

急雨臨官渡無情打客衣驚心當仄徑放眼得
斜暉宿鷺舒拳立棲鳥掠羽飛開顏投驛舍對
月一尊揮

十六日風雨不止旅舍卑隘多滲漏且無庖廩騾
馬竟夕立雨中勢不堪再留因各束雨具以待午
刻雨少間卽行五十里至仰化集俗稱眼花集土
人方言之訛耳飯畢時已下春復衝泥走五十里
宿順河集喜微風不雨月影在地及抵村落燈火
昏黃人家晚炊久矣連日道上同北往者幾千餘

騎是日盡落余後

旅邸不寐

一夜東風急羈人夢屢驚檐澌疑浙瀝市漏厭
分明辛苦長途歷蹉跎壯歲更空慚劉越石起
舞競雞聲

十七日風日晴和六十里次峒崕又六十里住紅
花埠自是入山左界

曉行

角角羣雞鳴疎窓影生白殘月猶在天衆星半
明沒顛倒理裳衣夢回猶恍惚行厨強進餐圍

人頻促發兀兀涉輿梁迢迢度阡陌途迷侶伴
呼露重輪蹄滑駉驢駕巾車廣袤不十笏趺坐
足卷曲履險心顛碗如何天地寬出門翻跼躅
笑余蓬蒿人忽作風塵客

十八日微風六十里次郟城經縣治雉堞圯毀屋
舍荒涼城內居民僅數十家誠瘠地也旅邸粳飯
無多佐以餠餅頗柔潤適口又六十里宿李家莊
屬沂縣人家煙火數倍於郟城途中遇健足北來
得項君景原抱疴南回消息便作家書付健足去

次郟城縣

若菴集 卷四
馬陵山外欲停驂
恰喜晴光散夕嵐
怪底連朝風雨急
惱人春色別江南

郟城道中卽事

儼鼓巫簫爭賽社
新筍裂齒不堪嘗
凌波那藉湘裙繞
甘李偏能植道旁

十九日風狂雨驟
行淖泥中甚苦七
十里抵鷺莊宿焉
海樵雨笠爲風吹
去詩以嘲之

嘲海樵失雨笠

龍山傲睨桓南郡
藍水羞含杜拾遺
不是征人輕棄擲
免冠泥首謝封姨

千里風塵負蒯緱
儒冠豈復遜兜鍪
搖鞭正喜彈非遠
何事無情不戀頭

二十日北風狂吼
兀兀坐車內羶帷
四蔽一無所覩爲
之悵悵七十里住
青駝寺行山徑中
喜逢項君景原於
途問無恙外立談
俄頃而別

青駝寺

北風悲嘯日蒼涼
絳繚征衣短後裝
長路關山

初作客清時斥堠
尚留防

沿途多列烽望

河流半啗崩沙

磧棘刺斜穿亂石
墻自入臨沂最蕭
索難收綺

語到奚囊

老耆集 卷四
二十一日陰午後微雪五十里次塚莊旅舍敞潔
有室有廡堊垣以粉可謂郵亭之最佳者更聞有
平康佳麗呼之卽來惜日尚午未便停驂飯罷行
六十里至蒙陰宿焉途中見 廷尉李公所備進
御花卉若山茶玉蘭金橘海棠之屬車載肩負相
望不絕又有白鶴二白鵲一白畫眉鳥一白獐一
黑猿一遍體深黝色性頗靜蹲踞檻內絕無嚙啮
擲躍之狀又五色松鼠一翠眉白吻腹下赭色背
及尻脰皆純黑光潤殊可愛

秦樓月

蒙陰道中

年時事吳頭楚尾江南地江南地輕陰做暝釀
花天氣而今作客渾無味燕南趙北征人騎
征人騎風欺雨打殘碑蕭寺

二十二日嚴寒薄日午後風更劇吹人面無色五
十里飯於新泰縣之花園鎮又六十里至羊流店
卽羊叔子故里也原擬宿此因亭館悉為有力者
所踞復走十五里宿於關橋

青墩驛舍偶作四韻一音成詩

牽确青墩路遙遙信馬蹄暫停山下驛徧讀壁
間題夾道柳纔發空林鳥不啼東風渾料峭作

意犯重綈

二十三日清明氣寒冽五十五里次崔家莊飯訖
四十里抵泰安州計程匆遽不暇登山以酬夙懷
擬俟歸途踐約云

望岱

馬上頻翹首依依仰岱宗乾坤迷漢碣

沒字碑相傳秦始皇

所立惟顧寧人定為漢武辨之甚悉

風雨護秦松天矯垂天翼微茫接

海峰征途空極目怙悵白雲封

二十四日晴爽大風飛塵撲面余坐羶車內亦不
能免沾凝昔人稱長安道上為軟紅塵豈是之謂

歟是日途中行旅衆多大半為禮岱香客洵巖巖
青嶽遐邇共瞻不僅為東南半壁所欽仰云五十
里次店臺又五十里宿張夏鎮是夕潛菴於旅店
招妓治饌作主人余為之盡醉

秦樓月

途中作

東風峭一鞭裊裊長安道長安道餅僖馬客余
分同調烏簷笠子征人帽此情空惹梅花笈
梅花笈溶溶春月西軒閒照

西軒余家別業

二十五日晴和五十里至杜家廟又五十里住晏
城地屬齊河縣經縣治東門道旁見人家園亭杏

花艷冶一枝斜露牆頭不減江南風景獨苦渡河
後所飲皆井泉鹹濁不能下咽枯渴之際欲求瓦
銚煮清泉淪松茗一杯不可得矣

二十六日大風塵飛揚余以夜來為郵卒詬評所
擾不能成寐升車後一枕遽然少補黑甜之不逮
行五十里至十里望余竟不覺也又六十五里至
平原縣東門止宿昔顏魯公作是郡太守祿山亂
公倡諸郡設兵保衛嚴備以待祿山遣使諭降公
大罵斬之今祠堂在縣治之東偏余特偕曹師暨
許汪兩子入城展拜惟見敗壁頽垣風雨零落不

堪寓目守斯土者安所辭其責焉相與歎息間有

保正周姓名鼎臣者持募簿一冊示余內為編修

陳公世信具疏引於首且捐資八金陳係浙江海

寧人曾主辛卯鄉闈於山左者也外則有禮侍胡

公作梅兵垣馬公之鵬各捐二金約計修葺之需

幾欲百金余以過客囊無餘資欲援三公例則仍

為不了之局擬至都門約一二同志以成其事

未卜得遂於異日否是夕旅舍主人出家醞名曰

煮酒色味并佳江南諸釀皆不及之

主人張姓

滿江紅

過平原謁顏魯公祠

落日蕭蕭孤城下西風悲咽憶天寶當年遺事
英雄銷骨譜就霓裳春殿試縮成鈿盒同心結
未驀一朝鞞鼓起漁陽金甌缺守尺土千秋節
爭坐位千金帖看風流慷慨梅花冰雪半壁頽
垣荒俎豆一堆蔓草埋碑碣羨乾坤正氣弟兄
存常山舌

又飲平原
煮酒

卸馱荒村無聊極情如羗渴喜童子青蚨三百
沽來佳物逗出芳馨梅共嗅釀成碧縹雲同潔
愛此君滋味耐久思清而冽也不羨鴉山雪

更休望綏山核筭儘堪排悶還宜醉月畢卓定
擽春甕死曼卿休羨流霞啜便相逢小戶莫教
辭三蕉葉

二十七日午刻大雨寒極五十里至黃河崖又三
十里抵德州城下度衛河浮橋時雨如翻盆輿上
四垂油幙不能外窺惟聞人語斷斷似極蕃庶地
也再二十里宿劉智廟雨止德屬苦久旱今始得
雨士女相慶

一童子病海樵出藥囊療之戲題以贈
冷雨酸風渡衛河瘡痛僕馬惱天魔先生道術

鴛籠慣肘後傳方自華佗

虞美人

聞德州羅酒甚佳
因雨阻不得沽飲

雨糟丘何處謀升斗
魂夢思京口
旁人遙指德州城
不數紅酥相伴有黃籐
東風忽釀沉沉霧
迷却斜橋路
呼童留我鷓鴣裘
恰正一天雨氣冷如秋

二十八日晴四十里景州又三十里漫河又二十里阜城縣宿焉景州塔為四方所稱塔凡十三級純以磚甃成無雕楠飛甍朱欄畫檻之屬望之濯濯然雖不飾觀而歷久無傾圮之患者亦以此

次阜城縣

縛袴息息事遠征
自憐太瘦一書生
樗材甘服

鹽車老壯志空憑
匣劍鳴枕畔
嚴更添不寐

途夜防甚嚴渡頭狂雨慣相迎
渡黃河沂河衛河皆值大雨華陽亭跡迷

芳草搖膝無言過阜城

二十九日行四十里富莊驛又三十里單家橋十里獻縣渡滹沱河又三十里宿商家林自景州入北直境內村落相望其間殷實者多築立堡砦高與城郭等上列雉堞可以瞭遠可以施火炮弓矢用備盜賊不虞其法甚善是日道旁童稚行乞者

頗多竊怪畿輔之地亦復爾爾

踏莎行 經滹沱河

疲馬衝塵荒堤問渡還傳文叔褰裳處抱薪蒸
火憶當年倉皇麥飯能相顧 落照無情亂鴉
無數真人白水今何去東流幽咽不成聲依稀
猶似堅冰互

三月初一日以驛站途遙五鼓即起行三十里入
河間府城天方曙又七十里任丘縣又十五里住
香城埠是日途中見柴車數輛載喇嘛僧數十悉
以銀鐺繫頸後有解官二押送自北而南不解何

故

初二日黎明行二十里至鄭州鄭州本漢縣即公
孫瓚所築易京也周世宗立鄭州明永樂年間撤
其城今土基尚存然居民稠密猶數倍於山左之
郟城十八里為趙北口一堤綿亘間以長橋水左
右繞之港汊流通大有江鄉風景元人有句長溝
如浙右下壤似淮東真不虛也又五十里白溝河
三十里新城縣是夕宿縣南門

趙北口驛壁見蒿亭題句因次韻寄示之

夾堤煙柳最濛濛野港波痕曲處通雨過遙天

垂淺黛春深小杏綻微紅龍驤水獵帆馳馬今

上嘗合水雁使雲程車鬪風
南北往來堤上者絡繹不絕囑取碧紗

籠好句愛君文采有誰同

初三日六十里涿州城郭崔巍橋梁坦迤車啍啍

馬騰騰往來者林林總總闐闐喧闐市貨駢集

皇都華麗先於此地略窺一斑矣二十五里琉璃

河金史作劉李河蓋因劉李二姓居之河以是名

今訛曰琉璃橋旁立一鐵柱半浸水中似為鎮壓

水怪而建者居人相傳為王彥章所用鐵槍言之

鑿鑿甚可笑也午刻飯於涿州之北城旅邸見壁

間有絕句詩二首乃一女子所作標梅之怨悉露

毫端良可念也其詩云寒雞初唱已中宵獨擁銀

釭耐寂寥一月不將奩具理侍兒猶道黛痕嬌密

意深深人未知自將新恨寫新詞郵亭多少題詩

客誰是當年杜牧之後書家君宦留京邸氏同母

入都旅館淒涼有感書此雲間月移題時年十七

齡云余是夕宿寶店計去涿四十五里途間接

汪子周士馬子植公手札云舍館已代定於蘇線

衙衙汪子更為余置器具全備約余共寓余不勞

而坐享其成是又出於望外者也

初四日七十里抵長新店日方亭午飯畢余獨乘
肩輿入彰義門至汪子周士寓余因曹師暨汪許
二子不便分住乃改寓於菓子巷口李氏之館午
橋姪所代假者也是夜飲午橋姪小齋酌紹酒大
醉

初五日苦腹滿不可耐勉偕汪馬諸公進前門候
諸友人午後歸卽就枕曹師汪子許子俱到寓
初六日偕魏子顯將吳子哲南入內城部署進呈
物件晚赴午姪酌是日許子復移寓於孫公園
都門喜晤午橋姪

師儉堂前共佩觿阿咸頭角最英奇青燈同抱

遺書恨

余與午姪俱
於早年失怙

紅豆爭填險韻詞羨爾鳳池

袍已錦慚余禪板鬢成絲可能爲我明光奏臣
叔而今大不癡

蒿亭自入京華鱗鴻疎濶於今四載餘矣客

歲讀薌嬰居士古瓶詩集始知假館於紫

香書屋且小星在寓樂可知矣宜乎金玉

爾音也今春把晤都門賦此誌喜豈云相

謔

旗亭紅袖撚冰絲爭唱才人畫壁詞淵博能窮

天府秘

聞著有鳥獸蟲魚錄

風流應奪上林枝。堪驚鳳闕餘

閒日。獨惜魚箋慰渴思。料爾紫香書屋裏。朝朝

勤畫遠山眉。

初七日四更赴暢春苑。因是日內大人未得間啟。奏遂留以待。余未携襪被。暫假茅舍半間。跌坐土炕。和衣假寐。靜聽金鑰遙想。玉珂少陵佳句。當不
 僅為掖垣中人道此語也。雞初鳴。即聞車馬之聲。砰訇騰沸。不絕於耳。率皆冠裳濟濟。劍珮鏘鏘。宛
 然半幅李思訓早朝圖畫也。按暢春苑乃明季武清伯李皇親園亭舊址。

今上因之置為

御苑苑週遭約十里許垣高不及

丈苑內綠色低迷紅英爛熳土阜平陀不尚竒峯怪石也軒楹雅素不事藻繪雕工也垣外行人於馬上時一窺見壘垣以亂石作冰裂紋每至雨後石色五彩煥發耀人目睛玉泉山之水走十餘里繞入苑河內復作琤琮戛琿聲流出宮墻苑後則列諸王池館花徑相通東則有悟真菴尼僧也西北則永寧觀羽士處焉聖化寺喇嘛處焉正西則廣仁宮西南則萬壽寺皆緇流處焉其餘梵刹頗多惟此數地為

上所常駐驛云苑門南嚮匝以紅欄欄內立銅獅二
遍身作翡翠色每當朝期羣臣方由此出入其於
平日則有東紅門二西鐵門二惟視

上所臨御焉遠近四圍老樹森立間以水田漠漠青
青魚蝦連市鵝鴨成羣村童田父耕鑿自如嬰遊
於化日光風中杳不知

天威之在咫尺宜乎其含哺鼓腹益歎

帝力為何有矣

初八日午刻回城寓過西直門道上見朱輪繡轂
錦簇花攢以節近寒食紛紛踏青上塚多有三河

望族四姓侯家夾騎導引於衛前雙鬟擁坐於幔
尾佳冶窈窕驚心眩目於是時也幾令江南狂客
無魂可銷矣

初九日入內城候客

初十日五鼓赴暢春苑因進呈禮物未整齊留宿
以待

十一日清明節風揚塵壒不能出庭戶午間大同
使來得吳伊垣姑丈書卽肩輿入城晤姚子婁園
十二日至暢春苑奏進物摺子先是請

旨於西頂寺令寶華僧衆禮懺敬祝

萬壽晚因至西頂以本日乃禮懺伊始也自西苑至寺約五里許一水灣環直達寺門夾岸長堤盡植桃柳是夕月光皎潔煙樹扶疎策馬踏堤上西望玉泉諸山蜿蜒葱蒨間以琳宮梵宇金碧輝煌夜景澄鮮殊可觀也

十三日寓西頂 帝畿四隅各有一頂以寓四岳之象西頂其一也 敕名廣仁宮內供女像三坐碧霞元君右光明菩薩左送子菩薩珠冠龍帔皆自大內所出者

今上五十年特發內帑修造輪奐巍然丹雘煥然

御製滿漢字碑文各一座令內務總管大人一員遊擊千總撥什庫各一員率披甲四十名晝夜防護其慎重也如此

十四日發家書後偕曹師汪子登車游西山行十餘里入山徑中亂石嶙峋輪苦礙不得舒車為之震動反側如舟船簸蕩於洪濤巨浪中不可耐乃舍車徒行初訪于公寺峰迴路轉相去十數武尚未知其有寺也及入門升堦登殿漸臻佳境矣其一松柏竒如蚪龍如幢蓋有垂枝及根復拔起者有展舒半翼交相讓者其一泉水竒池大不盈尺

琮琤瑋瑋作細嚮而出清可鑒毛髮味甘如酥乳
覺惠山中冷悉瞠乎其後矣其一佛像竒慈悲威
猛兼而有之壁間所繪諸天龍女生動如欲吐語
非名筆安能至是耶其一供具竒凡几龕爐瓶之
屬欵式精工悉倣內府寺初名碧雲菴創自元至
正間有碑存焉至明正德中御馬監太監于經拓
之為寺俗因呼為于公寺云按于經以便給得幸
嘗導武宗於通州張家灣權商賈舟車之稅歲入
銀八萬兩之外卽以自飽斥其餘羨以為寺且塑
其像於西廡立冢域於寺後武宗嘗臨幸焉賜額

曰顧命宗臣嘉靖初下獄瘦死籍其家寺與墓獨
存至天啓間魏忠賢復輸金大加修治寺後皆內
璫墳壙比如櫛如華表壯麗巖巖豐隆皆僭擬王
侯而上碑鐫御賜祭文有至再至三者可謂寵眷
極矣復於荒艸間見仆碑二龍章鳳篆更覺侈汰
詢之山僧卽忠賢之碑為向年御史張公瑗奏請
於朝奉

旨掘毀者也張乃吾徽郡祁門人中辛未會元此舉
誠為快事獨塚破後僅有衣冠耳攷崇禎登極謫
忠賢鳳陽守祖陵忠賢至阜城乃自縊縊後仍取

其尸戮於市夫安能復窀穸於此又按崇禎末年
流寇猖獗在廷諸臣盡植黨懷私一籌莫展懷宗
憤恨激烈復還忠賢官爵或於斯時其黨招衣冠
而葬未可定也寺僧全彰朴訥寡文然無俗韻頗
堪與語啖其一飯而別欲尋香山寺中途迷道適
逢樵者至極稱洪光寺中之幽靚因贈之青蚨委
以鄉導行亂石中久之遙見松頂露寺角樵者指
云循此松徑紆迴屈曲其折凡九名曰九盤盡處
卽寺也遂別去余輩拾級緩登喜虬枝蒙翳不透
日影歷數盤後足力憊矣小憩崖石上見一歌斜

草徑可直達寺後余遂鼓勇攝衣而上忽聞有操
吳音而笑者曰此地非終南客何為由捷徑耶視
之則一候門僧詢其人則生於吳而髡於燕者也
延入客寮一長老趨出肅客字曰梅池丰骨清癯
鬚眉朗爽吐詞疊疊可聽曩駐錫於江南海陵之
北山寺近奉

上命主方丈於此寺內有千佛殿窓櫺四啟面面玲
瓏而諸天法相另具竒態梅公出所作本寺八景
詩見示頗有新句足以怡人也問香山寺卽與之
鄰近然風景相去不啻河漢大殿為祝融所燬佛

身露風日中。蟪蛄掛體羣鳥爭。巢荆棘間。惟斷礎
焦椽而已。因歎劫火相遭。興廢有定。佛且不免。而
况於人乎。令人淒然。其不可留也。乃迴車出谷口。
杏花滿目。歸至西頂。而月印前溪久矣。

碧雲寺

即于公寺

紺宇凌空翠嵐光。面面收銀蠶。封馬鬣。雪乳濺
龍湫。風定鈴空語。厨荒僧不留。豐碑休再讀。往
事重人愁。

洪光寺贈梅池上人

盤環探鳥道。一刹白雲通。梵語松風外。茶煙花

雨中清言慚許掾。暢法得支公。冰雪哦新句。幽
尋興未窮。

香山寺

絕巘開金碧。當年競物華。銷沉餘劫火。啞軋繞
慈鴉。一綫寒泉水。半山殘杏花。蒼涼真滿目。客
過幾停車。

十五日禮懺西頂恭值 裕親王世子奉 母福
金進香 世子年始三十有二已得子十人羅列
輿前丰神秀拔舉止温恭望而知其為 天潢之
貴胄也

十六日居停主人以饋餼見餽

十七日

聖駕由暢春苑回宮庭等跪迎於西直門道上巳刻
皇太后鑾輿先入城昇用阿監十二名後車十二乘
悉皆朱輪黃幘窓嵌玻璃每一輛用阿監八人居
前挽勒者三夾翼扶輪者二殿後推轂者三皆團
花茜襖絳帽黃纓簇擁而行少頃則有華旗芝蓋
月扇雲麾隼旗翠節豹尾金幢按隊分鑣魚貫鶴
列不敢少紊執持者披天青紵袍遍排織金壽字
次則教坊全部象管龍笙簫韶緩奏融融怡怡次

則侍衛從官蟒衣名馬各捧彤弓盧矢寶劍鸞刀
金交椅金几案各一金盆金盒金提爐各二瑞煙
繚繞香靄繽紛中露赭黃曲柄小蓋夾道臣民咸
知

聖天子將臨一時盡屏氣調息肅容伏謁

上御大輦金碧璀璨綺疏玲瓏昇用三十六人諸親
王服團龍繡袍珠冠玉帶徒步扶輦和緩雍容仰
窺

天顏含笑海宇生春羣黎瞻拜之下莫不私心慶幸
載路嵩呼誠千載一時之盛事也

十八日午門朝賀畢

聖駕卽赴暢春苑同人仍趨至日昨俯伏處祇候

皇太后暨 諸後宮車乘馳過後鹵簿鑾儀若斧鉞

戈戟旌旄旗節之屬較昨陳列者迥乎不同持仗

宿衛皆乘騎矣鐃吹畫角嘹唳悠揚則有繡服諸

郎各手控御馬共二十騎駟驪驂馱無色不備血

汗蘭筋風蹄竹耳悉屬天閑上選德力兼稱者也

雉尾團扇中

御駕肩輿舁者十六人輿四面不施軒櫺就日瞻雲

尤為親切伏見

上服織金赭龍袍外籠石青團龍緞褂

聖容和豫萬姓歡騰庭 等以草莽微臣兩日之間得

兩覲

天顏更蒙 溫語下詢如綸如綍不識何修而得倖

邀此異數也

鑾輿過後有萬騎千官蹒蹒濟濟兼之紳衿士女雜

以白叟黃童闐街塞市余偕曹師各乘馬向西苑

以道阻不能卽達久之至苑門則業已有

旨傳入苑中觀 皇會矣余等因急趨而前入西柵

門旁卽虎圈豹房柵門以內雖王公大人非奉

旨不敢擅入者也時則鼉鼓逢逢彩旗隊隊其間綠竿撞索吐火吞刀傀儡偃師魚龍角觝諸戲畢備更有裝成臺閣數十座皆暗藏機杼幻出神工或海市蜃樓或鳥歌獸舞見者莫不咋舌稱竒驚心駭目也 皇會畢復傳至買賣街街在萬柳陰中牽蘿為屋中列周鼎商彝琕瓌鞞鞞官哥柴汝窰色離竒米蔡蘇黃法書光怪非具碧眼波斯安能一一辨識徘徊既久羣情暢適謹辭出各散去是日海樵入城朝賀乘馬晚出未得同進 御苑縱觀頗為缺然

十九日西頂寺禮懺晚有中涓紛紛投宿乃知詰朝

皇上奉

皇太后駕幸西頂寺拈香

二十日午刻

上奉

皇太后乘舟幸西頂寺先是守堤士卒各佩刀環列堤上頃之一卒趨而至手持黃籤一枝高尺許寬徑寸衆呼曰籌下矣遂挨站更遞不敢刻留詢之其籌有五逡巡次第傳送至五籌下時卽起

駕時也守堤者急汲水遍灑堤上以防塵起遂有侍
衛官監等紛紛飛騎沿堤而來後勒立仗馬五對
牽纜黃頭僅十數人

上與

皇太后共坐一飛仙船不施丹藻窓眼數楞惟中間
四扇簌以雲母餘皆襯空明素紙舟前有獨木小
舟二各載侍衛數人水道儀從如是而已夫豈無
龍艘鳳舳錦纜牙樯殿脚三千彩帆百幅皆屏而
弗御自古帝王躬行儉德風勵萬世未有如

今上者矣

西頂寺河干接駕

晝漏催傳第五籌。袞衣端拂下龍樓。風扶細柳
搖青雀。水裛香塵襯紫駟。喜望旌旗迎仗左。慚
無文賦上螭頭。遙聞視膳承歡笑。春遍皇都
瑞靄浮。

二十一日早微雨卽霽接家書得伯父手札

二十二日禮懺畢夜雨

二十三日大雨連綿擬入城預治歸裝竟為所阻
京師衢道一經滂沱泥淖深濘屐齒莫施枯坐西
頂寓室內卽堦下亦不能跬步悶可知矣塘報人

送江南試錄來閱知交獲雋惟一二而已更加索然

西頂坐雨步海樵韻

煙含絲柳抱長河。桃浪痕添花雨多。日暗三竿迷曉夢。霧沉五里擁愁魔。木天可許遙窺測。石鼓終當恣撫摩。幾陣鄰鐘飄午吹。依稀如和客高歌。

二十四日赴西苑啟奏進呈筵席摺子

二十五日五鼓赴西苑是日

皇上召直隸各省老人叩祝

萬壽者共七千餘人輪班入苑賜酒食銀帛各有差

年八十以上者

至尊手賜酒一爵八十以下者皆親王貝勒舉觴

凡老人拜起悉命侍衛左右扶掖之興朝養老

之禮雖唐虞三代莫能踰焉猗歟盛哉

二十六日午刻羣竚候於西鐵門內侍魏公持奏

摺出蒙

上賜收紫毫筆十箱跪懇再四復蒙收彩箋千幅所

進筵席奉

旨全收着於二十八日備進藜藿鄙味草野微忱仰

恩宥不加斥棄何榮如之何幸如之

二十七日移寓西苑邸舍

二十八日恭進漢席百筵餽餽滿席百筵蒙

恩收進隨跪辭回南本日未下

旨

二十九日內侍魏公傳

旨着於初二日起程可先於初一日齊集鐵門伺候

奉

上諭後各散歸寓時方卓午因偕曹師海樵約汪子

周士姚子安思馬子植公吳子哲南冠子瑤集同
作玉泉之遊自御苑西偏繞長堤而行約五里

有湖焉玉泉之水悉瀦於此水清見底柳綠撐天

鳧鷖鷗鷺游泳於沙汀鯉鯽鱖鱣潑刺於波面蒲

葦交錯藻荇參差有駕小艇採芡白者有踞磯上

垂綸者有陰坐老樹看洗馬者江村勝致卽圖畫

未足以盡之隔堤稻田千頃田高於湖以錫作滑

稽引水倒注跨堤灌田滔滔不絕其水甘而肥故

玉泉之田不藉糞漑而籽粒長白且香美云再五

里入山欲觀泉發源處見苑門鑄固其額曰靜明

園御筆也有宿衛守護禁不得入循牆徘徊聞
水聲潺潺尋之得泉二道自苑牆流出高可數尺
飛瓊濺玉作勢澎湃似怒石梁前橫直欲吞噬之
狀凭欄靜玩良久心境冷然毛髮悚然如濯此身
於冰壺中不復知有塵囂世矣苑右一小寺內石
洞二夏桂洲來游題名於此山僧汲泉供客惜為
煤火所熱失真味矣姚子馬子冠子曹師以日已
西斜踉蹌先別去余及諸人仍緩轡而歸

遊玉泉山

夜雨壓塵塵不起西山爽氣朝來紫山根環繞

最微茫白雲英英波瀾瀾中擁青螺一髻浮宵
壑層巖處處幽玉泉融液金莖露花徑潛流傍
御溝探竒共約提壺盧或命籃輿或驅驢幾院
陰濃延晝坐一畦膏潤帶春鋤斜橋曲岸遙相
續柳花成陣風飄玉麥苗剡剡接天青荇尾離
離映汀綠豁然千頃散漣漪舴艋中流落釣絲
雪肪溜匙誇滑膩銀鱗錦色紛離披路轉不聞
林鳥喧葳蕤深鎖靜明園重幃籠得瀟湘色露
幹橫拖眉黛痕何處虬龍發狂嘯左右石梁飛
冷瀑清韻能移凡俗心澄光頓洗風塵貌更尋

野寺山之阿。老僧汲泉供茗柯。昔賢題石字未滅。我為讀罷還撫摩。漸覺晚風吹白袷。勝游逸興將無恹。凝眸來日對煙嵐。手笏不須頻拄頰。三十日發家書午後雨。

四月初一日雨雪寒甚羣赴西鐵門候

旨至晡時蒙 賜克食叩謝畢遂辭出

暢春苑紀勝六首

蓬萊紫氣接西山。遙擁靈臺駐 聖鑾。一桁鶯

花開赭幄半篙春。水到紅欄蠲租早。愜扶犁望

酺會尤騰倚杖歡。暇日 御筵親灑翰。龍騫鳳

翥拜千官

香風剪剪逗雲璈。幾陣鈿車倚碧桃。月抱瑤弓

調鵲血。霜橫寶鏐膩。鵝膏紫纒黃。帶環三駕豹

尾鸞。翎具六韜為近。玉皇天壽節。一時齊換

錦宮袍

聯翩花萼鬪新音。常博 天顏為解頤。鸚鵡籠

邊親製曲。葡萄錦上競裁詩。千重翡翠迎仙館

百尺琅玕引鳳枝。幾處松扉臨曲水。碧欄干外

柳絲絲

玲瓏花影亞紅墻。半是侯家綠野堂。漱灑波光

分太液菁葱喬蔭出長楊從奴慣解調鷹技少
婦偏梳墮馬妝陌上卓金車子過軟塵暗帶粉
脂香
梵刹重重靜不譁吉祥鐘磬演龍華賜將環具
光凝雪散出蟬香燦落霞嘗賜哈密瓜麵餠
餠給禮懺僧人身現
帝王親說法心通妙諦獨拈花虬鬚可識西來
意繡帽黃衫白鼻騮

鳳凰池上擅才名彩筆凌雲賦兩京曉露柳拖
金轡重春風花壓翠裘輕冲霄久惜毛全鍛鑄
鐵堪憐錯已成不及玉泉山下水瑤琮長傍

御溝鳴

初二日回京邸答候諸友晚赴寇子瑤集酌

初三日晚赴蔡子眉白李子懋晚席是日發書遣
大同使回

初四日早晨赴宮坊閻公錫爵招飯畢閻遣其長

班張姓僱車二輛載余與曹師汪子入西華門至
象房觀象象共二十有九各踞一房每用鐵索繫
其一足於石柱體嶷然屹立不移獨其鼻較輶下
垂動掉不已壽最久其中有二象乃自明神宗時
至今者羣象奴爭索青蚨給以數百猶嘒嘒不休

遂趨出登車少折而東傍宮牆北面迤邐緩行約數里許至太液池綠陰映帶碧水漣漪跨二石橋橋各立二榜其南曰金鰲曰玉竦其北曰積翠曰堆雲二橋相距處間以嵯峨飛閣其形旋轉無稜卽承光殿俗稱圓殿者是也佇立橋上遙見瀛臺五龍亭在水中央猶蓬萊三山可望而不可卽令人深結褰裳之想焉復驅車至厚載門南瞻鳳城鴛瓦丹碧交輝北望景山聳然秀拔蒼翠相映山麓立有官學凡內務府子弟悉令入官學讀書其師則教習出身滿三年以知縣錄用者其弟子學

業有成卽送入部充筆帖式辦事解舍弘敞書聲琅琅達於戶外過者無不傾耳由是出東華門復

回閤寓暢飲同席者庶常胡公煦柯公喬年縣令

許公祚遠皆閤同郡者也至更餘歸同寓項子睦

洲設酌遲余久矣飲至三鼓余以腹痛遽辭入就寢

初五日午刻赴通政羅公瞻席又赴姚子婁園席

飲易酒甚佳晚赴僉事李公可淳席

初六日臥病未出庶常鄭公之儁召飲未赴

初七日往別許子潛菴告治歸裝曹師汪子先發

長新店以待

初八日別諸友人已刻登車宿寶店

都門留別

嬌絲脆管遞招歡。春袖淋漓酒不乾。敢望燕臺收馬骨。頻煩安邑餽豬肝。舊縈心曲成蕉鹿。新署頭銜是橘官。拂罷征塵還野服。竹根如意籜皮冠。

長安少年

十萬成盧興未闌。銅盤淚滿炬光寒。琵琶翻出伊涼調。醉擁燕姬馬上彈。

初九日宿白溝河投旅店時已曛黑聞距此十五里楊椒山先生之墓在焉以不得展拜為憾

清平樂

過樂毅故里

古今同病。遇合渾難定。自謝微臣偏不佞。何以奉承王命。片言四國連兵。一時七十餘城。堪笑火攻下策。田單竟爾成名。

初十日宿任丘縣晚於宿店逢巴子繡天朱子惠斯北去

十一日宿商家林

十二日踈雨晚霽宿阜城縣

途中心占

春衫隨處浣塵沙。莫訝征人苦憶家。此日小窓輕霧裏。胆瓶芍藥試新茶。

文杏當堦綴落霞。雪球風顫數枝斜。無端遙問桑乾水。閑却西軒一院花。

十三日曉霧至巳刻方開。爽晚宿德州城下。沽羅酒飲之。色味較少。遜於平原也。

十四日雨後無塵。輕陰不見日。途中得此甚暢。是夕宿平原二十里舖。

金菊對芙蓉

過東方曼倩故里

細霧絲輕。遙天卵色。衛河西去悠悠。見歲星故里。斜抱沙洲。茂陵癡結蓬萊想。笑馬肝一片空投。碧桃千歲。小兒無賴。已是三偷。金門大隱。堪留。每逢占射覆。謔語呶嘍。羨細君分賜。偏恁風流。懸珠編貝。渾無用。問書生何日封侯。一般長歎。侏儒飽死。肉食無謀。

十五日雨未刻。次禹城黃舖。余分途赴歷城。訂曹師汪子待余於泰安州。余是夜宿馬站。計去黃舖二十里。投驛舍時雨甚猛。

次禹城與曹師汪子暫別一首。用趙北口題。

驛壁韻

祝阿城下雨迷濛。岱嶽函山四望通。風颭麥芽
新葉翠。煙籠寺角古牆紅。賓鴻有意懷南裔。越
鳥無心戀北風。客路暫時猶惜別。殘燈旅夢料
相同。

十六日晴六十里抵歷城。歷城枕山而城東南。歷
山函山一帶。削劣婉孌。時宿雨初收。殘烟未斂。望
去不甚了了。城中多泉。其源自下而上。人家堦前
悉壘石為池。涓涓不竭。摩詰詩云。城外青山如屋
裏。東家流水入西鄰。似為歷城而作也。入城候臬

臺蔡公

琦回宿旅舍

十七日候運使羅公。鈐縣令劉公。元琦羅卽前任

新安太守余舊公祖也。已刻赴蔡公席。席間以修
復平原魯公祠為請。公欣然首允。余喜夙志之能
酬。遂連浮十數大白。至未刻。別出西門。羅公遣人
送酒席幣物於途。意甚厚也。是日行五十里。住開
山店

歷下作

麥浪桑陰面面環。蠟墻茆屋儘幽閒。香浮綠雪
堦前水。雨散白雲簾。外山城市悠然饒。野趣風

塵竊自笑顏顏他年戴笠牽黃犢來共西疇十畝間。

十八日鷄初鳴即起未及盥漱登車行四十里至青陽舖入野店餐黃梁粥甚甘美又四十五里至界首方投旅館進午餐天忽雨雹數陣大如橡栗落堦石上有聲頃之即止日復出土人笑相謂曰雹少麥不致傷又雹現豈可豐收之兆余又行五十里抵泰安與曹師海樵會預覓小筍輿三輛為次日登岱計

十九日黎明乘筍輿入州城南門出北門遙望峯

巒環列雄峙相若不辨其孰為岱宗也入山徑不數里至一天門俗稱紅門者是也數里為萬仙樓自此石級盤繞仄磴欹斜輿人橫其軀側足作蟹行肩輿而上漸聞澗水滾滾入耳泠然又五里為高老橋歷詢居人無一知高老為誰何者又數里為水簾洞泉水下注遇一橫石梗其前泉遂分流散漫垂滴巖上如珠之貫成簾也今水涸僅得此名耳又數里為歇馬崖絕壁凌空浮青積翠游人至此罔有不按轡留連者又數里為迴馬嶺峯勢巒屹石路崎嶇游人至此罔有不駐驂躊躇者歇

馬以景名迴馬以險名也又數里為御仗巖石壁上鐫題七十二君輦路處有飛來石踞其旁相傳秦封五大夫松卽在此土人於衆松中標出五株謂之曰大夫不知五大夫本秦官名非五株松之謂卽如獨異志所載始皇登封泰山至半忽大風雨雷電路旁有五松樹蔭翳數畝乃封為五松大夫而此標出者復絕無竒特與諸松等耳亦未可指為真也又數里至對松山兩崖相峙瀑布斜飛隨石徑一道逶迤而下青松白雲高山流水繆葛映帶少陵絕壁過雲開錦繡疎松隔水奏笙簧之

句當是於此地拾入奚囊也再十里為二天門右有朝陽洞泉流更鏗錡可聽又十里至三天門中歷小龍口大龍口經十八盤階級更陡余坐輿內目眩神惛遂捨輿徒步策短杖而登直達元君殿門門常扃游人叩門外懸鐘司門者聞聲而出照驗稅單方延客入拜禱既畢有羽士王道者導余輦出殿門折而東上約里許至嶽帝廟廟後峭壁上卽唐開元磨崖碑作擘窠隸書筆畫道勁文辭典麗惜下段損蝕不能竟讀右鐫

今上御書雲峯二大字相傳仍有顏魯公及蘇頌字

蹟在磨崖左右物色之杳無跡矣西折百餘步爲
玉皇殿殿居岱之頂門外卽沒字碑高丈餘徑三
尺許厚尺許竊思銘碑安用若斯之厚當是埋金
函玉檢處以此石作鎮無疑矣日觀秦觀居其東
丈人峯孔子崖居其西山頂仍有積雪數處山氣
凜冽風色尖峭余披重裘猶有餘瘁初登時雲霧
瀰漫山谷百步外莫可辨識咸抱悒快謂徒虛此
一登且腹之餒矣將無歸王道者固留旋拾松枝
爇火炊飯作餅佐以野蔬數種味皆清潔甘美無
煙火氣相與飽餐出戶欲別忽天風數陣煙雲頓

爲捲散海宇一清縱目四望無不了然大哉觀乎
直以培塿視諸山溝澮視江河登此以小天下聖
人豈欺我哉頃之雲氣復結欲歎翳翳渺乎不可
復見豈非山靈之特厚余輩而故開此生面歟觀
止矣遂下山輿行甚疾不若升高之艱窘然余惴
惴不敢俯窺仍策杖而下抵旅舍足已雙繭而心
尚怦怦未定也

登岱

拔地盤空菡萏垂。岱宗千古擅雄奇。俯觀海日
蒼茫出。平散天風瀕洞吹。阿閣神房何處覓。金

泥玉檢更誰窺。振衣縱覽人間世。一髮中原。兩儀。

二十日宿羊流店

沁園春

羊叔子故里

汶水之南。觸目而思。太傅風流。羨戈戟堆中。逍遙緩帶。旌旗隊裏。談笑輕裘。信壓東吳。功成西晉。卓識推賢。志竟酬。還堪笑。笑青囊不謬。折臂公侯。偶來故里。勾留。歎何必。峴山始欲。愁剩麥穗離離。一雙社燕。棗林纂纂。幾處啼鳩。濁酒孤澆。殘碑頻拂。匣底龍吟。嘯崩。而今事。總欺

人伎倆。楚楚蜉蝣。

似娘兒

經汶上野店中買得玫瑰數朵

繞舍綠絲颺。綻一叢紫艷。新妝嬌憨。似解窺人笑。輕盈含露。攜沾雙袖。逗出濃香。櫻筍好風光。論江南。忒煞顛狂。深閨整日。盈籠買。將他揉碎。窳殘宮粉。襯遍羅囊。

二十一日宿蒙陰縣

二十二日宿青駝寺

孟夏日再過青駝寺

白草黃沙慘客顏。春深茅屋晝常關。而今畧似

江南景麥脚搖青接遠山
二十三日宿李家莊

唐多令

二疏散
金臺

黃石去飄然良弓早自全更何人翻倦知還濟

濟東門開祖帳爭指道二君賢 野服樂林泉

傾囊散俸錢問遺臺滿目寒煙佳話千秋傳不

盡還繪出畫圖間

唐宋人嘗作二疏
還鄉圖畫傳世

二十四日微雨午後風甚大宿紅花埠

二十五日次順河集改就水道時運河糧艘鱗集

乃於黃河覓得二舟輕裝減從而登是夜東南風

急未得解維然釋車馬之勞而獲舟楫之安形神

暢適致足樂矣

二十六日風雨交至盪雙槳行黃河中一百五十

里泊桃源縣

二十七日雨止北風大作張帆順流一百九十里

抵淮日方午往候伯叔弟姪之在淮者酉刻登舟

乘風夜下根輿姪齋中膽瓶插有牡丹一朵芍藥

二朶香艷動人因余愛之遣人遺贈舟中燈下對

花酌臘黃酒耳後風生豪興勃勃殊不覺江南春

之已去多時也

夏日本淮陰舟中咏瓶內牡丹芍藥拈得探字
春歸檣燕語呢喃似訴韶光尚可探宛是浦川
供雅謔還驚亭北帶餘慙香浮琥珀重呼酒人
上蜻蛉乍釋驂縱得花枝解憐惜客襟塵泥不
勝慚

二十八日風逆不得張颿舟人盪漿甚力於酉刻
方抵家

是役也自春徂夏為期七十有七日計程四千
五百餘里其間蒙

聖澤汪濊

恩賚有加更得以仰瞻廊廟之崇高宮闕之瓌麗人
物之磊砢英多山川之雄莽奇秀是亦壯觀也
烏可以不記間并系之以詩若詞云

若菴集卷第四

余與若菴遊見其詞若詩素矣未見其能史也往
余喜讀王延壽魯靈光殿賦與木華海賦謂一實
一虛皆能各造其極若引我於千門萬戶洪濤巨
浸間以觀其奇險之狀余忘貧矣今雖老不事詩
書然偶得小盎松本亦欲寸寸而修之針針而養
之若可待撐雲蔽日之態凌霜傲雪之操癡哉蓋
傷吾遊踪不遠及也今年花朝若菴舍我遊
都下余益無聊閉戶理小盎松而望之矣及見若
菴歸問無恙外便以停驂隨筆示余曰別後瑣瑣
不能罄或盡在是余持歸讀一再竟不欲去諸懷

袖益歎若庵之才不獨王文考木元虛作賦之奇也若庵於長安道上往返僅七十七日其間飲食寢興人事擾雜風雨待候者半之猶暇得詩詞如許篇日記文且倍之而

皇都之壯麗河嶽之精神皎如着列無足異獨是篇中用筆嚴密處不落稗官聲調不入支那窠臼微言遜行之妙皆於意外得之井井大家殆直造子長孟堅之室矣噫吾老矣雖有芒屨竹杖安用遠遊為今而後詠此一卷臥遊京華泰岱間不猶踰於理小益松而望之耶若庵真史才哉真史才

哉里中同學弟杜乘跋

二



二

自燕臺以至邗邳為途以里計者二千二百五十
有幾歷郡邑者三十而往返未三匝月其間驅車
碾碓曳輪汗潦風晨雨夕朝脂暮秣所以震心駭
目疲精勞神者不一而足豈曰晏遊耶迺又以職
貢往待

命闕下繭足不失尺寸者月餘此即有佳山水奚
能暢所欲遊而若菴乘罇必停驂登眺感慨繫之
其於長途汗漫中又能獨具靈慧隨有領悟命筆
志載發為詩歌憶余方就道時為若菴所強首出
數韻祈若菴和既而漸蹶矣安能如若菴之娛娛

不竭如湧泉之流也哉同硯弟東海樵人汪道行
拜手識

[Faint vertical text columns, likely bleed-through from the reverse side of the page]



